

La Befana de la zia Paola

Go proprio voja de dirve 'sta roba
Parchè so che voialtri no ghe badè
Anca se mi son vecia storta e goba:
da mile ani mi vegno e desso scoltè:
conosso tuti per nomi e cognomi
de le volte confondo i camineti,
me fasso on fià de confusion co i doni,
magari scanbio siori co poareti,
portando ai primi na branca de carbon
e a st'altri 'na steca de mandolato.
Vorìa a tuti portarghe un ano bon,
un mondo gentile, in pase, educato.
'na speranza me preme pì de tute,
co vedo tristi e magri, stì museti,
de poderli nutrir tuti in salute
co mama insième e popà, benedeti!
Penseve quanto a caminar pa 'l mondo
ghe vol de forza, corajo e fadiga!
mi me toca ogni ano e ve rispondo
che la motoscoa me smonta a Pianiga.
Po', su e zò par case senpre pì alte,
busi de camini senpre pì streti,
co 'l capogiro a sbrissar so le malte
par portarve in tenpo i regaleti.
E ghe xè chi dise che mi so morta!
Eh no! jèro in ritardo drio la Brenta,

sto rivando, tegnì verta la porta!
Se qualcun almanco me dà 'na spenta
faria partir oncara la motoscoa:
son vecia sì, go le buganze ai piè,
rivar in tempo la xè 'na parola
però mi so da quanto che me spetè!

***Eviva la Befana
co 'l naso rosso
e calze de lana!***

***A chi dise che la xè morta
che ghe vegna la boca storta!***

***A chi pensa che no la xè vera,
mal de panza fin a sera!***

***A chi ghe crede e la varda in viso
basi tanti e on gran soriso!***

Noale, 25/11/17

Dino Libralato

LAMENTO 2018 BORGO CANPOSANPIERO

Co socoli, tabaro e capelo nero
riva 'l borgo parte Canposanpiero!
No pa' far lagnanze ma dir el vero!!!!
E informare on fià so qualche mistero.
Pa' capir se i çimisi che vien da dove
che nissun sa, sia una de le prove,
par verzame i oci, che Dio ga mandà:
racolti 'i ne magna, verdure e fruti
i spussa e fa dano pezo de tuti.
Pensaimo che fusse mejo de l'oro
vivar so i canpi del nostro laoro:
xè finia anca sta ultima speranza,
resta debiti e dolori de panza!
Destruta ormai sarà la nostra tera
tra arso, piove acide e gas sera.
A la sindaca, tornada in zona,
che la pol vedar ela de persona,
co la passa de sera o de matina,
senza dover girar par la Cina,
ghe disemo ben ciaro e tondo,
avanti che finissa el mondo:
ghe gala mai dà 'na ociada
come xè messa 'sta contrada?

Par 'sti sbregghi e par 'ste buse
trovarala de le altre scuse?
Tra Parauro, Cerva e Bonaroti,
no passa on dì senza musì roti,
senpre a riscio de farse del male
par chi vol sbocar so la provinciale,
no se parla de chi traversa a piè
fora de le strisse... che no ghi n'è!
Trafico invesse ghi n'emo anca massa
senza nissun che ordine ghi 'n fassa.
No stemo pì dir quante rogne ghe xé
prima che la boca voialtri ne sarè
parchè, star voressimo in alegria,
portando a tuta 'sta bela compagnia
de salute e zoje, on bel fagoto
che dura par tuto el domiledisdoto!
Bote piena e malatia nissuna,
e po' tanti bocie dentro la cuna!
Speranza e pase ve augura davvero
tuto 'l Borgo verso Canposanpiero!

Noale, 08/12/17

Dino Libralato

LAMENTO 2018 BORGO MESTRE

Par **MESTRE!!!** Vien dito el nostro borgo,
drio onde ghe jéra polenta e sorgo!
Dell'Oasi desso, i vol che lo ciamemo
in grassia cussì de quel che perdemo.
Par riconpensa oncor pì profonda,
scondendo la tore i fa 'na rotonda!
Quel che pì insusta e pesa anca massa:
no verzar la strada che porta in piassa
scondendo a l'ocio el vedar pì belo
co te vien vanti dal passajo a livelo!
No pa saver, ma tanto pa dimandar,
se 'ndarà via Lando, cossa lasseo far?
E 'sto sotopasso par via Mestrina?!...
da massa ani ormai el se strassina,
no saria tenpo de vegnerghene fora
prima che ve mandemo tuti in malora?
Co la storia de la indipendenza
'ndarà a fenir che me lassè senza.
Co i comuni che passa de confine
uno par volta fin rivarghe a la fine!
Pare sia questa 'na moderna usanza,
tuti zà pronti a fare transumanza.
Visto che se libara el padilion Ferante:
dato che poareti no ghi n'è par gnente,

come che ne dise ogni benpensante,
vegnarà ciuso definitivamente
el passajo interno verso la stassion,
tegnendome serai, dentro, in preson?
Tante saria le robe anca pì brute,
ma no ghemo tenpo pa dirvele tute!
Ghemo buo arso, inondazion e giasso
però nissun se move dal palazzo.
Ga ocorso on continuo taramoto
par sborirghene fora sete o oto!
Beh! pa 'sti giorni e i mesi futuri
istesso ve femo i mejo auguri!
Che finalmente se veda la fine
de massacri, de atentati e rapine!
Che dolori e malatie staga distanti
xè l'augurio che femo a tuti quanti!
Che mai ve manca salado e menestre,
amor e pase! Viva borgo MESTRE!!!!

08/12/17 Noale

Dino Libralato

LAMENTO 2018 BORGO MIRAN

Riva i mejo!!!... quei del Borgo MIRAN,
co scarpe rote e braghesse in man!
Rivai semo par 'na scommessa...
drio 'na strada cussì mal messa,
risciando parfin le strasse,
pieni de gataro, de frève e torse!
Co 'sto mondo tuto in rivoluzion
voressimo fare 'na interrogassion
a chi me governa ormai da un toco,
co 'n risultato che par massa poco:
vanti verzar on centro commerciale
gavio studià far on ponte so 'l canale?
Comunicare e vie Tigli e Copadoro:
co poca spesa se fa 'n bon lavoro,
saria pa 'l stadio un parcheggio a tiro
e par le nostre case on bon respiro!
Co poca strada se pol far le spese
rivando mejo anca in centro al paese.
E po' volemo presentar lagnanza
par essar i ultimi so la bilanza:
me fassì girar in longo, vardè come,
tanto che ghemo fruà parfin le gome!
Co tute 'ste storie e ciari de lune
va finir che canbiemo de comune,
parchè la storia vegna sanada

costreti saremo far come Sapada!
Stroichemo da senpre, da sti ani passai,
xé finio la paziensa, semo incanai.
No ciacole, volemo fati concreti,
prediche e parole robe da preti!
No me piase gnente le robe storte,
a tutto el resto ghe versemo le porte.
Vivar in pase xé 'l primo pensiero,
volerse del ben co cuore sincero
restando unii, pronti a darse 'na man
'sto augurio ve porta el BORGO MIRAN!
Curti i discorsi ma longhe le sopresse!
Che le nostre done sia tutte contesse:
che rispetto i omeni senpre ghe mena
tegnendole fora da ogni pena.
Strucandose forte co cuore sincero
se femo i auguri per l'ano intiero!!!

03/12/17 Noale

Dino Libralato

pirola 2018 spetando 'l fumo 1°

Ve disarò 'na roba vecia par prima

e ve la canto anca in rima,

e se no basta, co 'l sorriso,

ve la disarò anca in corsivo:

ch'el sotopasso par Treviso,

da çinquantani ormai promesso,

lo volemo, ma proprio adesso!

Par via de le strade mazenae

no stè dirme pì monae,

par la vergogna de i marciapiè,

scuse altre no ghe n'è!

No stè a dirme de volar alti

fin che el paese more drento i spalti!

La cura par le boteghe che va male

no xè verzar n'altro çentro commerciale

dandoghe favori e agevolazion

co 'l fumo de on fià de ocupazion,

senza badarghe a l'inquinamento,

al traffico e al cemento

che da zona verde e rurale

xé sassinà anca Noale!

E vien fate regole intorcolà e fine

par brusar 'ste quatro fassine,

inveçe che la luna mostrando el deo

a 'sta zente restà senza çervelo!

poco credemo ai toseti inrabià

che senpre siga co l'ocio intavanà

spuando sentense , ciò, sa tuto lori!

e a noialtri i me lassa fadighe e suori!

Gnente che vaga ben, tuto xè sbalià:

la proposta de jèri on quò xè canbià!

Anca i novi ormai xè facie vecie

da quanto li me siga drento le recie.

La storia continua, la xè senpre quella,

tuti pensa a inpenirse la scarsela!

Via la Caritas dal vecio ospeal,

che novità xé in vista par Noal?

Co 'sti scuri de luna e scheli ciari

finirà tuto in man de palazzinari?

Saria proprio 'na gran brutta idea

scomissiar a far qualche economia

metendo da parte on fià de monea

concentrando i ufissi semenai via:

che li staga soto l'ocio del paron

ridusendo spese e cressendo rese?

Saltaria fora posto pa' le associazion

picàe come so l'albaro le sarese,

Parché vantarse che vivo xè el paese

fassendose beli co se va in giro

senza curarghene gnanca un respiro?

Pa' ben governar ghe vol ocio longo,

tanto corajo e no paura del mondo!

che chi va forte speta chi va pian,

e ch'el babio se chièta Donal Trump

cussì come quello de la Corea,

portando 'na speranza on fià pi bela!

Dai, tosati, supiè so ch'el fogo!

Da fumo e faìve mi el rèspeçe togo!

Cossa x'èle 'ste storie , quante smanie!...

Vegnì vanti femene a tòr su le tanie!

20/12/17 Dino Libralato

pirola 2018 spetando 'l fumo 2°

Vardando in alto, là verso le stele,
chi ghin vede solo çinque e chi mile.

Voialtri provè de trovar 'e pì bele
pa' no farve dopo el sangue in bile!

E po' credarghe co fede se deve,
inpegnandose co forza e passion
senza farse vegner la frève
par ogni piccolo rebalton.

Sarà anca questo, che novo riva,
on ano strano, a so modo diverso
senza 'na andata quieta e gualiva
co de le robe messe de traverso,
ma chi de ani ghi n'a anca massa
sa a quale darghene on dessora,
sa ben quale che ben presto passa
e da quale no te ghin vien pi fora.

In malora 'ndarà la nostra fadiga
se 'l fumo se tra verso Pianiga!
Ghe voria del vento de Bora
par salvarse da 'sta malora!

Se e 'l s'introsa par Borgoricco
se pol prevedar ano rico!
Ma pa' on pronostego bon davvero
Cogna che 'l gira so Canposanpiero.

El podaria ciamar on ano belo
anca se 'l gira da parte Castelo!
Lassarme ancora qualche sorriso

se 'l se introsasse da parte Treviso!

Ma se 'l cala zò par Scorzè

poco de bon seguro trovarè.

'ndando in basso a Spinea o Miran

poca polenta e ancor manco pan!.....

Varda quanto popolo che xé rivà!!!

sperando che 'l pronostego bon sia tirà!

Tuti so la Pirola a scoltar 'l mago,

ragionar so i fati de l'ano passà,

so 'l rèspeçe torbio e on fià vago

capir se 'l xé giusto o sbalià!

El me rèspeçe xé giusto e no vago,

garantisso mi, parola de mago!

Cossa xé stà dito?... mi no ricordo,

ma 'l ciamava seguro ano balordo!

Preciso no lo recorda nissuno!

Trato cussì, anca par via del fumo.....

Desso el se leva quasi normale

ciapando giusto la strada par Noale

scalda la speranza e porta pase

sgorla l'ignoranza e le bonbe tase!

Se 'l fumo girasse parte Castelo

podaria portar on ano pì belo!

Ohe! parla ciaro, fèssa de on mago,

par 'st'ano, almanco che uno te capissa!

vegnui, semo, par cavar se 'na spissa,

se ben no te parli, mi no te pago!

Mi? Parlo ben mi!..., a li segni sto atento.

Ma varda che storia! Li se la ciapa co mi,

pensèo che sia façile far mèjo de cussì?!?

Inveçe, vedio che stranbo de vento
che mena el fumo par drito e roverso?...
gnanca par mi no xè divertimento
'l ciama rèspeçe senpre diverso!

Varda che storie pa' vegner al fato!

Poche ciacole, fa el to mestiero,
fati, volemo, e li volemo da vero,
senza inbrogessi o tiri da mato!

Co 'l Concilio de Trento xé sta sarà,
solo do maghi se ga salvà!

CORO *solo do maghi*

Li vedo! Li vien co Marco montà so'l leon
a segnare ano tristo o ano bon!

CORO *Ano tristo o ano bon?*

Vedo 'l mago del Bosco del Montelo,
in mèso al vento, alto, su, in cielo!

E anca 'l vecio Schieson Trevisan,
fisciando e sigando, vien a darme na man!

CORO *Schieson Trevisan?*

El ga parlà co maghi, co strighe e co puteli, **CORO: maghi, strighe puteli,**
vardando 'l vento, 'a çénare, el se gà ciucià i déi,

Go interrogà parfin la Giorgia e anca Andrea

Par capir se gavaremo anata trista o bela!

CORO: anata trista o bela!

No 'l bada a meterologhi che fa prevision,
da San Stefano 'l tien stuà la television
co strussie, e fadiga 'l darà a conclusion,

CORO: *conclusion, conclusion*

ma...visto 'l caligo e 'sto cielo scuro...
che del tuto la possa essar vera,
gnanca mi saria proprio seguro,
scoltème ben... ve la dirò staséra:

Eco, 'l fumo se tra verso Castelo

prometendo de portar on ano pì belo!

